

【學泅水】徐姿華原作

佢一旦就當驚水，小學一年生該下，先生鼓勵大家學泅水，講泅水係當好個運動，身邊個好同學做下學會泅水哩，硬性個佢乜毋願輸人，轉去屋下就緊嘢¹阿姆講愛去學泅水。趕等暑假，阿姆同佢尋著一間溫水個游泳池，還問著名聲盡好個教練來教佢，過買一身靚靚個連身游泳衫分佢，鼓勵佢勇敢學泅水。

第一到去到游泳池，又驚又好。做好軟身運動，教練帶佢同另外四個學生仔練習沒水、學換氣，同佢兜一個一個拗入游泳池。佢兜乖乖聽教練個指示，同頭那沉²入水裡肚，佢嚇到胚命仔扳等游泳池脣、腳跣跣仔毋敢沾著水、抽骸另命、噉到目流鼻串，像分人苦毒到當衰過樣仔；脣項個人做下緊看佢緊笑，教練緊拐佢，佢還係噉到抽骸、毋肯落水，高不將正喊阿姆同佢帶轉去。

該暗晡，阿爸軟聲勸話佢繼續去學泅水；阿姆就唉唉唧唧道嘆：「你毋去上課，學費就了忒哩，無好退！」阿哥也分享自家學泅水個經驗，還拿出佢盡愛惜個極樂仔講愛做佢學會泅水個獎品。在大家個鼓勵之下，佢答應第二日愛過去上游泳課。

第二日朝晨，阿姆愛載佢去上游泳課，催了催佢還係啊啊奶奶³、這摸該摸毋肯停動。上課時間硬硬會赴毋著咧，阿姆發譴擊雞毛掃仔⁴愛修理佢，佢試著當委屈，又驚分阿姆打又驚去泅水，就噉到大痲聲，歸條巷仔都聽到清清楚楚。鄰舍過來關心，知著佢係驚泅水正噉到恁大聲，做下忍等笑來鼓勵佢。就恁仔，該站時間，朝晨頭巷頭巷尾若係聽著佢又噉到噉噉滾⁵，就知該日佢又愛去上游泳課咧。

經過三禮拜個訓練，游泳課個同學一儕儕都學會泅也，同學一陣換了一陣，佢還係手同腳配合毋著，手記得划咧腳又毋記得踢，實在毋得結煞。有一日，佢自家在該練習，毋多知仔手同腳嘎配合得著哩，泅有五公尺恁遠，心肝肚實在還歡喜哪！佢續等過練，緊練緊知得該要領，手腳較省力哩，圓身也緊來緊輕鬆，佢正第一擺感受著泅水個趣味。

感謝該當時，屋下人個鼓勵，分驚水個佢面對自家個困難去學泅水，分佢有機會去克服自家較軟弱個所在，這下個佢，毋單淨曉得泅水哩，也有信心去面对人生個各種挑戰。

¹ 嘢：音 kieuˋ；小孩子對大人有所要求的聲音或動作。

² 沉：音 ciim；因外力所致而被推入、沒入水中。

³ 啊啊奶奶：音 aˊ aˊ naiˊ naiˊ；懶懶散散、愛理不理的樣子。

⁴ 雞毛掃仔：音 gieˊ moˊ so eˋ；雞毛撻子。

⁵ 噉噉滾：音 ve ve gunˋ；不斷的大叫或大哭。

【滿天星】李得福原作

來到屏東、姐公个菁仔園，裡肚一行行仔高天天个檳榔樹，聽講兩、三十年前，這位一分地一年做得收十過萬銀，還愛牽電火來掌菁仔。園仔裡肚係有火光，賊仔就毋敢來偷割哩，毋過今這下个菁仔無麼个價，正賣頭擺十分之一個價定定。雖然賣毋成錢，姐公還係打理到青柳柳仔，菁行中間還同佢種加兜仔時計果¹，乜做得賣加一息仔錢。檳榔樹準柱頓²，利用廢電線來搭棚仔，有紅電線、烏電索、雙股个白片線，邊脣用白片線牽透籠，紅烏電線橫架直架刺³做三長過⁴个彩色時計果棚。

逐年个三月春分前後時計果開花咧，青花托撐等吊菜色个花，還有牽白鬚个花皮、副花帽；第二層係五皮青黃色个公花，合等⁵當賣个花粉；盡頂高係有三支像擰螺絲仔个扳手、又像豬仔个飯匙骨个，該就係嫵个花。佢識看過姐公擎一支毛筆，在每一蕊花頂高蘸蘸搵搵像畫圖樣

¹ 時計果：音 to^ˋ kied so^ˋ；百香果，四縣腔語音源於日語「時計草」。

² 柱頓：音 cu^ˊ dun^ˋ；柱子。

³ 刺：音 qiag^ˋ；以尖銳像針的東西扎入，織。

⁴ 三長過：音 sam^ˊ cong^ˋ go；超過三長列。

⁵ 合等：音 gag^ˋ den^ˋ；分配布置著。

仔，佢問姐公講：「阿公，你在該做麼个？」佢指等花同佢講：「佢同公花个花粉蘸來膏在嫵花个花心頂，恁樣正會打子啊！」

棚仔頂吊到淄淄一粒粒仔青青个細果子仔，企在棚底下看往上⁶就像係滿天星斗，阿公講佢種个時計果品種就安到「滿天星」。佢兜就像係佢伸手就摸得著也摘得著、又乜食得著个星仔呢！

清明過後無幾久，時計果就會轉烏黝紅，係講看啊去暗紅暗紅無青影个就做得摘咧。佢兜姊妹仔在棚仔下，臥頭一粒看過一粒定定仔相，相著係紅到轉烏色个就熟咗，甜度罇擺較毋會酸。摘著有半菜籃仔就遽遽扛去倒入紙箱仔肚，一轉、兩轉、三轉同紙箱仔裝到淄淄，愛載轉高雄冰起來定定仔食。熱天放學轉，阿姆會同時計果洗淨，在蒂頭頂个外皮頂，挖⁷一隻像五十個銀恁大个空，放在水果盤頂，分佢兜拿細調羹仔定定仔舀來食。正摘啊著个時計果特別甜，佢一下去⁸就食忒七粒，酸藕酸藕緊食緊入味，連鼻公散出來个氣又乜酸藕酸藕帶有時計果个味緒。

阿姆成時會同時計果裡肚个仁還過味挖出來，加一息仔冷滾水放入果汁機打，再過用盞仔裝好放冰箱冰，分佢兜準果汁啣。每擺係啣著這果汁，就會想著在果棚下煞猛做事，頭那毛蓬白、開容笑面个姐公。

⁶ 看往上：音 kon gong^ˊ song^ˊ；向上看。

⁷ 挖：音 va^ˊ；用手、工具掏取或掘取。

⁸ 一下去：音 id^ˋ ha hi；一下子。

【放蝦公笏¹】郭亭好原作

拜六阿爸帶佢兜共下轉去莊下看阿公、阿婆。阿公看著佢兜轉來當歡喜，老妹盡使妮，一下仔就縱去搨等阿公，講佢盡想阿公，聽著老妹嘴恁甜，阿公笑到哈哈滾。在灶下無間个阿婆，聽著佢兜轉來，手頂還擎等个鑊鏟赴毋掣放，就行等出來，手緊拏吾頭那，笑咪咪仔講：「兩儕做下較高也較作肉²哩！還好哪！」

當晝睡跣起來，佢看著阿公用白飯攪糠仔撚到一細團一細團仔放到蝦公笏裡肚，佢講等下愛去放笏仔。聽著愛「放笏仔」，佢試著異生趣就嚙³愛珍，頭下滿⁴阿公驚佢危險毋肯分佢去，佢緊同阿公保證佢會細義，高不將阿公正帶佢共下去。

河壩肚滿哪仔都係生溜苔个石頭，佢試著著等水靴仔行路當毋慣，行無兩步腳溜⁵一下險險跌倒，該載阿公手腳恁流掠，遽遽同佢揪等，佢講逐步腳都愛先試躡看啊，係毋會溜人正好躡上去。佢兜定定仔行到

水較淺个位所，阿公教佢講，笏仔愛放在水較恬又有石縫个所在，佢同水底个細砂石仔用手搨平來分笏仔做得貼地，過將笏嘴順等水流个方向，再尋一粒石頭砥在笏仔面，講恁仔笏仔正毋會分水打走，盡尾還愛在脣頂个大石頭面頂放幾粒仔細石頭做記號，恁仔收笏仔个時節正知笏仔放在哪位。佢兜順等河壩同蝦公笏放一路下，到天會暗咧，正做下放好勢。

第二日本來同阿公講好愛共下去收蝦公笏，佢嘎睡到日頭晒屎拙地都還言跣。阿公自家同笏仔做下收轉來咧，正喊佢跣床，湊佢共下來退蝦公笏。佢聽著阿公喊，煞煞跳跣起來，牙齒儘採鑪兩下仔就縱等出去同阿公搨手。逐隻笏仔裝著个東西做下無麼个共樣，退一隻笏仔就像開一到獎，有个裝著蝦公、細鯉仔，有个裝著毛蟹、石賓仔，成半下還會裝著湖鰱仔，實在還生趣！

這兜對鮮鮮河壩水肚來个好食材，在阿婆个好手路料理之下，當晝歸桌仔又萋又好食个魚仔、蝦公，還有阿婆種个萋萋个青菜，十分豐沛！飯桌頂佢兜緊食飯緊講笑，歡喜个心情試著逐樣都恁好食。臨暗仔佢兜愛轉地，車仔正駛停動，佢就遽遽同窗門撇下來，大聲喊講：「阿公！另擺係愛去放蝦公笏个時節，定著愛記得帶佢共下去哦！」阿公緊搨手，頭那緊頷緊應：「好！」

¹ 蝦公笏：音 haˋ gungˊ hoˋ；竹製的捕蝦器具。

² 作肉：音 zogˋ ngiugˋ；長肉、生肉。

³ 嚙：音 kieuˋ；小孩子對大人有所要求的聲音或動作。

⁴ 頭下滿：音 teuˋ ha manˊ；一開始、第一次。

⁵ 溜：音 tiu；滑動、滑落。

【該條大崎】黃美貞原作

歇在伙房个人家，出出入入定著愛經過大崎，頭擺該位仔有種一大片个香絲樹，故所大崎又安到「香絲坪」。對細人仔來講，去讀書愛蹶該條大崎斯異難耐¹，毋過日仔總愛過，香絲坪乜變大家人生活个一部分，佢盡記得个就係同阿雪溜大崎，無擋仔該件事情。

上屋个阿雪大佢三歲，五年生該下，就自家箭自行車去讀書，上大崎該下，愛企等煞猛牯箭，箭毋贏正甘願下來用牽，書包仔放在面前个籃仔頂，看起來風神哎哎²，該央時，細人伴仔都當欽羨佢。有一擺，佢在大崎頂堵著阿雪，佢講：「佢載你下崎愛無？」佢想著阿姆个叮嚀，心肚唉唉唧唧³，就講：「毋使，毋使！佢自家行轉去就好哩。」阿雪恃夠夠⁴講：「佢日日就溜啊轉，又遽又暢快，還過擋線正換新个，愁麼个？」佢用手試撚啊，車仔黏時就頓恬⁵，看起來異妥當，胚想試一擺就好，阿姆毋會知啦！

¹ 難耐：音 nan ˘ ngai；指事情艱難不容易。

² 風神哎哎：音 fung ˘ siin ˘ ngai ngai；洋洋得意。

³ 唉唉唧唧：音 ai ˘ ai ˘ jid jid；哀聲嘆氣的樣子。

⁴ 恃夠夠：音 sii gieu gieu；自信滿滿。

⁵ 頓恬：音 dun ˘ diam ˘；停止。

跋上車，在崎頂看啊下，阿姆哀！腳底撓撓，雞麻皮緊起，阿雪講：「你會驚係無？」佢毋擔輸贏應佢：「有麼个好驚？」其實佢驚到會死又毋敢講。阿雪吩咐佢扳好來，佢兩隻手揪等阿雪个衫，兩粒目珠眨到緬緬，車仔順順仔溜下去，聽著唧唧个擋仔聲，心肝加異定貼，按算加一下仔就到哩。無想著，溜到半崎个時節，擋仔嘎恬忒，這時節，阿雪開聲喊：「無擋仔咧！這擺就死無命哩！」佢毋知愛仰結煞正好，就跔等阿雪緊喊。

砰聲仔！車仔對對去撞著一墩笏竹，吾目珠擘啊開來，看著阿雪橫在竹頭下，企毋起來，緊噉緊呻：「還痛！還痛哦！」佢摸一下溼溼个鼻公，手巴掌全係血，原來係出鼻旺仔哩，該載手腳還做得停動。佢定定仔跋跔起來，顧毋得歸鼻公个血，一路行轉去伙房尋人，好得阿泉叔兩子爺堵好轉夜，奧多拜正熄火，擎起廳下个藤椅，跋腳就去同阿雪扛轉屋下，遽遽打電話請莊頭个魏先生來看。阿雪也命靚，淨手腳鑪溜皮定定，毋過可能係嚇著咁，暗晡頭緊發狂⁶，食睡毋得，厥婆還帶佢去陂塘下恩主公收驚。

該擺溜大崎逞英雄个事情，一下恹起來，心肝窟還會掣一下，雞麻皮又膨膨起咧！

⁶ 發狂：音 bod ˘ kong ˘；失去理性，舉止狂烈、異常。